

四庫全書

子部

欽定四庫全書

子部

名賢氏族言行類稿卷十六至十九

詳校官典籍臣潘奕雋

主事臣祁韻士覆勘

總校官進士臣朱 銓

校對官主事臣馮 培

謄錄監生臣郭 遇

欽定四庫全書

名賢氏族言行類稿卷十六

宋章定撰

桓

三百七

姓纂姜姓齊桓公之後以謚為姓又宋桓公之後向
魍亦號桓氏河南官氏志烏丸氏改姓桓

左傳宣公十二年桓子鼓於中軍曰先濟者有賞

後漢桓譚字君山以父任為郎上疏非讖出為六安郡

丞

桓榮字春卿光武拜為議郎每朝會輒令於公卿前敷
奏經書帝稱善曰得生幾晚因拜博士車駕幸大學
會諸博士論難榮被儒服溫恭有蘊藉辯明經義每
以禮讓相厭不以辭長勝人後為太子少傅賜以輜車
乘馬大會諸生陳其車馬印綬曰今日所蒙稽古之
力也三雍成拜為五更子郁字仲恩以父任為郎桓
帝時常居中論經書問以政事遷侍中授經二帝恩

寵甚篤 曾孫典暉彬 典字公雅舉孝廉拜侍御

史常乘驄馬京師畏憚語曰行行且止避驄馬御史

暉字文林尤脩志介一餐不受於人 彬字彥林

舉孝廉拜尚書郎蔡邕以其有過人者四樹碑頌焉

自榮至典世宗其道父子兄弟代作帝師

桓焉字叔元郁之子明經篤行有名稱為太子太傅順

帝立授經禁中傳業者數百人

魏志桓階字伯緒舉孝廉論儲副之宜公規密諫前後

懇至太祖知其篤於守正深器重焉

晉書桓彝字茂倫早獲盛名雅為周顗所重嘗歎曰茂倫嶽嶠歷落固可笑人也累遷尚書吏部郎名顯朝廷補宣城內史在郡有惠政為百姓所懷蘇峻之亂固守經年城陷遇害抱中和之氣懷不撓之節知處死之為易仁者之勇不其然乎五子溫雲豁祕冲

桓溫字元子生未期而溫嶠見之曰此兒有奇骨可試使啼及聞其聲曰真英物也眼如紫石稜鬚作蝟毛

磔

桓雲字雲子都督司豫二州西陽太守

桓豁字郎子為新野義城二郡太守遷征西大將軍子

石虔石秀石民石生石綏石康皆知名 石虔小字

鎮惡文武器幹御戎有方終豫州刺史 石秀幼有

令名博涉羣書為江州刺史西陽太守 石民弱冠

知名為荊州刺史才望甚為人情所仰

桓冲字幼子淹識有武幹盡忠王室忠言嘉謀每盡心

力屢遷都督後為荊州刺史屢挫苻堅之師四方鎮
扞以為己任求之名臣抑亦可算三子 嗣字恭祖
少有清譽為桓氏子姪之冠為江州刺史莅事簡約
轉西陽襄城二郡太守 謙字敬祖 脩字承祖
嗣子胤字茂遠少有清操初拜祕書丞遷中書令

桓宣鎮襄陽招懷初附勸課農桑簡刑罰略威儀或載
鉏耒於輶軒或親芸穫於隴畝甚有稱績

桓伊字叔夏有武幹標悟簡率授淮南太守綏御有方

進都督豫州刺史有大功而始終不替 善吹笛盡一時之妙

南史桓康隨齊武帝起兵摧堅陷陣膂力絕人江南人畏之以其名怖小兒病瘡者寫其形帖牀壁無不立愈

唐桓彥範字士則潤州人狄仁傑曰君之才當日光大毋卹于初厚為禮 張柬之將誅易之等引與定策以彥範敬暉為左右羽林將軍屬以禁兵斬易之

中宗復位以彥範為侍中 工屬文所志惟忠孝居
若不能言及議論帝前安辭定色辯爭愈切卒謚忠
烈 弟玄範官至常州刺史 臣範工部侍郎

潘 三百八

姓纂周文王後畢公之子季孫食采於潘因氏焉
左傳宣公十二年潘黨率游闕四十乘從唐侯為左拒
以從上軍 楚重次于衡雍潘黨曰盍築武軍以為
京觀臣聞克敵必示子孫以無忘武功 潘黨逐魏

錡趙旃夜至於楚軍席於軍門之外 成十六年晉

侯伐鄭楚救鄭彭名御楚共王潘黨為右 黨與養

由基蹲甲而射徹七札焉以示楚王曰君有二臣如此

何憂於戰 潘黨字叔黨楚大夫潘阡之子阡字師

叔賢楚人崇之

文公元年楚穆王立以其為太子之室與潘崇使為太

師且掌環列之尹

吳志潘璋字文珪為豫章西安長寇不入境 為人麤醜

猛禁令肅然所領兵馬不過數千而其所在常如萬人

潘濬字承明武陵人爲湘鄉令治甚有名 奉法不憚

私義公情剖斷有大丈夫格業

晉書潘岳字安仁鄉邑號爲奇童 作籍田賦 才名

冠世出爲河陽令 負其才而鬱鬱不得志 轉懷

令頻宰二邑勤於政績補尚書度支郎遷廷尉評

仕宦不達乃作閒居賦 太夫人御版輿升輕軒遠

覽王畿近周家園 思緒雲騫辭鋒景煥 岳藻如

江濯美錦而增綢 從子尼字正叔少有清才以文

章見知舉秀才為太常博士出為宛令寬而不縱厲

公平而遺人事 轉著作郎為乘輿箴 歷祕書監

太常卿 含咀藝文履危居正可謂玉質而金相者

矣

史潘京字世長樂廣與之共談曰君天才過人恨不學

耳若學必為一代談宗 歷巴丘邵陵泉陵三令明

於政術路不拾遺

南史潘綜吳興人有司奏改其里為純孝里

北史潘永基字紹業輕財好施為常樂太守又除潁川太守前後在州為吏人所愛

潘樂字相貴寬厚有膽畧神武時以軍功拜雍州刺史文苑潘徽字伯彥受詩禮並通大義尤精三史

唐潘好禮貝州人第明經開元初為邠王府長史王為滑州刺史好禮兼府司馬知州事王御下不能肅詔

好禮檢督王每游觀好禮必諫乃卧馬下呼曰云云
王慙為還 子請舉明經好禮曰經不明不可妄進
博學能論議節行脩整無所傾附

潘師正居逍遙谷高宗幸東都召見問所須對曰茂松
清泉臣所須也既不乏矣帝尊異之詔即其廬作崇
唐觀卒謚體玄先生

潘孟陽史亡何所人父炎為劉晏壻晏任權雖書疏報
答未嘗輒開時稱有古人節晏得罪亦坐貶司馬

孟陽少以門蔭俄登博學宏詞科憲宗新立詔孟陽
馳驛江淮視財賦加鹽鐵轉運并察諸使治否孟陽
從者數百人所至會賓客留連倡樂譽望大損其後
左司鄭敬宣慰江淮帝誠曰朕宮中用尺寸物皆有
籍唯賑民無所計卿是行毋若潘孟陽殫財費酣飲
游山寺而已

宋朝潘美字仲詢魏郡人也周世宗為開封尹美以中
涓事世宗及即位徙供奉官高平之戰美以功遷西

上閤門副使稍遷客省使 太祖與美素相厚既受

禪命諭旨中外陝帥袁彥凶悍太祖慮其為變以美
監其軍俾圖之美至喻以天命彥遂入朝太祖曰潘
美不殺袁彥而彥朝覲成我志矣 征嶺南以美將

行營諸軍克富賀昭桂連五州拔韶州斬獲凡數萬
計鉅勢窮蹙乃遣其臣奉表至軍中乞降美因諭以
上意以為彼若能戰則與之戰不能戰則勸之守不
能守則諭之降不能降則死不能死則亡非此五者

他不得受使者泣銀復遣其弟保興率衆拒戰銀衆十五萬依山谷堅壁以待王師美因築壘休士與諸將計曰彼編竹木爲柵若以火焚之必擾亂以銳師夾擊之萬全策也遂分遣丁夫數千人持二炬間道造其柵暮夜萬炬俱發天大風火勢甚盛銀衆驚擾來犯王師美麾兵急擊之銀衆大敗斬數萬計長驅至廣州銀盡焚其府庫遂克之擒銀送京師 開寶七年征江南以美與曹彬偕往金陵平以功拜宣徽

北院使後判并州加同平章事卒諡武惠子惟德惟
固惟正惟清惟熙惟吉惟熙女即章懷皇后也追封
美鄭王惟吉子夙

潘大臨字邠老江西人專學山谷為詩謝無逸嘗以書
問有新詩否答曰秋來景物件件是佳句恨為俗氣
蔽翳昨日得句云滿城風雨近重陽忽催租人至遂
敗人意止一句奉寄王直方云邠老詩多犯老杜為
之不已老杜亦難為存活老杜復生則須與潘十廝

炒

安 三百九

風俗通漢有安成

北史安同遼東胡人性端嚴明惠好長者之言出入禁

中典庶事後持節循察并定二州糾舉守宰不法郡

國肅然在官明察長於校閱家法脩整為世所稱

子屈

安屈典太倉事盜官粳米數石欲以養親同大怒求戮

屈自劾不能訓子明帝嘉而恕之遂詔長給米 屈
弟原雅性矜嚴沈勇多智畧累遷尚書左僕射 弟
頡辯慧多策畧

唐安金藏京兆人在太常工籍睿宗為皇嗣有誣皇嗣
異謀者武后詔來俊臣問狀金藏大呼曰公不信我
言請剖心以明皇嗣不反也引刀自刺腹中腸出被
地眩而仆后聞大驚命高醫內腸閱夕而蘇后臨視
歎曰吾有子不能自明不如爾之忠也詔停獄是時

朝廷士大夫翕然稱其誼 神龍初母喪葬南闕口

營石墳晝夜不息地本燥泉忽湧流李冬有花本道
使盧懷慎上其事詔表闕於閭屬其事於史官詔鑲
其名於泰華二山碑以為榮 子承恩遠孫敬則

五代安重誨應州人也少事明宗為人明敏謹恪明宗
鎮安國以為中門使及兵變於魏所與謀議大計皆
重誨與霍彥威決之明宗即位以為樞密使在位六
年累加侍郎兼中書令其勢傾動天下雖其盡忠勞

心時有補益而恃功矜寵威福自出

安金全代北人也為人驍果工騎射官至刺史以疾居
太原莊宗已下魏博與梁相距河上梁將王檀襲太
原晉兵皆從莊宗于河上太原無備監軍張承業大
恐金全強起謂承業曰太原晉之根本一旦不守則
大事去矣老夫誠慙矣尚能為公破賊承業嘉之授
以甲兵金全被甲跨馬召率子弟及故將吏百餘人
夜出北門擊檀檀軍驚潰而去明宗即位拜金全振

武軍節度使同平章事

安彥威字國俊代州崞縣人也少隸唐明宗麾下頗知兵法嘗為牙將以謹厚見信晉高祖入立徙鎮歸德是時河決滑州命彥威塞之彥威出私錢募民治隄遷西京留守遭歲大饑彥威賑撫饑民民有犯法皆寬貸之饑民愛之不忍流去彥威與安太妃同宗出帝事以為舅彥威未嘗以為言及卒太妃臨哭人始知其同宗也當時益稱其慎重

安叔遷字膺宗沙陀三部落人也明宗時與討王都拜
秦州刺史從擊契丹以功拜昭武軍節度使叔遷狀
貌堂堂而不通文字所為鄙陋時人謂之沒字碑晉
出帝時為左金吾衛上將軍契丹犯京師晉百官迎
見耶律德光于赤岡叔遷出班夷言德光勞曰是安
沒字否汝在邢州已通誠款吾今至此當與汝一喫
飯處叔遷再拜乃以為鎮國軍節度使

宋朝安燾字厚卿開封人也舉進士元豐初使高麗還

拜右諫議大夫六年拜同知樞密院事時夏人款塞
燾請因而撫之且戒將吏毋生邊隙既又請疆場非
要害者還之以示恩然羌情無厭當使知吾宥過而
罷兵不應示吾厭兵之意哲宗嗣位乃遂其前議於
是歸其葭蘆等四砦元祐二年進知院事燾謂為國
者不可好用兵又不可畏用兵好則疲弊生靈畏則
取侮遺患今朝廷每戒邊臣非舉國入寇不得應之
則固畏用兵矣然虜數犯塞亦未免疲弊之患雖僅

保城砦適墮其計中願復講攻擾之策如左氏所謂
用三師以疲楚之意此計之上也燾以母喪免服除
知鄆州改鄭州移潁昌府紹聖元年拜門下侍郎知
河南其將請去也燾奏曰自紹聖元符以來用事之
臣但持紹述之虛名以誑惑君父上則欲固寵位以
快恩讎下則欲希進用而肆朋附并為一談牢不可
破彼自為謀則善矣然未嘗以毫髮為朝廷計者也
安惇字處厚廣安軍人也以上舍釋褐紹聖初召為國

子司業改右司員外郎遷右諫議大夫元符初為御史中丞惇與蹇序辰看詳元祐訴理所公案惇奏凡得罪於元豐之間乞特出睿斷以勸沮天下由是復施行者千餘人

安堯臣惇之孫政和元年五月上書論宦寺專命交結權臣共唱北伐之議以謂燕雲之役興則邊隙遂開宦寺之權重則皇綱不振今者中外之人咸謂童貫深結蔡京同納燕人李良嗣以為謀主欲建平燕之

議臣恐異時脣亡齒寒境有可乘之釁狼子野心蓄
銳伺隙以逞其所大欲此臣所以日夜為陛下寒心
伏望思祖宗積累之艱難鑒歷代君臣之得失杜塞
邊隙務守景德舊好上嘉之十一月十三日御筆比緣
大臣建議恢復燕雲故地安堯臣遠方書生能陳歷
代興衰之迹達於朕聽臣僚咸謂毀薄時政首沮大
事乞重行竄殛朕以承平日久言路壅蔽敢諫之士
不當寘之典刑議加爵賞僉論何私堯臣先次補承

務郎

見長編

顏

三百一十

姓纂出琅邪本自魯伯禽支庶有食采於顏邑者因
而著族又邾武公字曰顏故公羊傳稱顏公後遂為
氏

家語孔子北遊於農山曰二三子各言志顏回曰願得
明王聖主輔相之敷其五教導之以禮樂

論語德行顏淵閔子騫 回也聞一以知十

孟子顏淵曰舜何人也予何人也有為者亦若是

揚子顏淵習孔子者也

顏常晞夫子矣

或問淵竊

之徒惡乎在曰寢或曰淵竊曷不寢曰攀龍鱗附鳳
翼翼以揚之勃勃乎其不可及也如其寢

左傳昭公二十六年師及齊師戰于炊鼻顏鳴三入齊
師呼曰林雍乘

定公八年公侵齊門于陽州士皆坐列曰顏高之弓六
鈞皆取而傳觀之

哀公十一年武叔蒧乘孟孺子洩帥右師顏羽御二
十七年鄭請救于齊齊師將興陳成子屬孤子三日
朝設乘車兩馬繫五邑焉召顏涿聚之

史記顏回字子淵魯人 顏無繇字路顏回父 顏幸

字子柳 顏高字子驕 顏祖字襄 顏之僕字叔

魯人 顏嚮字子聲魯人 顏何字冉魯人皆孔子

弟子

晉孝友顏含字弘都少有操行以孝聞累遷侍中除吳

郡太守所歷簡而有思明而能斷以威御下王導歎
曰顏公在事吳人斂手矣

南史顏延之字延年曾祖含 讀書無所不覽文章冠

絕當時仕宋為中書侍郎 踈誕不能取容當世

性褊激肆意直言論者謂之顏彪 鮑照曰君詩若

鋪錦列繡雕績滿眼 議者以延之謝靈運自潘岳

陸機之後文士莫及江右稱潘陸江左稱顏謝 子

竣字士遜晉孝成時轉吏部尚書留心選舉任遇既

隆奏無不可容貌嚴莊賓客喧訴常歡笑答之人言
顏竣瞋而與人官

顏師伯字長深竣族兄剛正有局力晉孝武時累遷侍
中居權日久天下輻湊游其門者爵位莫不踰分

遷左僕射

文學顏協字子和少以器局稱博涉羣書工草隸飛白
卒於荊州記室時顧協亦在蕃邸與協同名才學相
亞府中稱爲二協

文學顏晃字元明好學有辭采家世單門而介然脩立
為當世所知仕陳兼中書舍人掌詔詰

北史文苑顏之推字介博覽書史辭情典麗仕齊為
中書舍人弟之儀字升博涉羣書好為詞賦周明
帝以為麟趾學士

唐顏師古字籀之推之孫少博覽精詁訓善屬文隋仁
壽中授安養尉楊素見其年弱謂曰安養劇縣子何
以治之師古曰割雞未用牛刀素驚其言大後果以

幹治聞高祖入關遷中書舍人專典機密性敏給練
治體方軍國務多詔令一出其手冊奏之工當時未
有及者太宗即位嘗歎五經去聖遠傳習寢訛詔師
古於祕書省考定多所釐正誼據該明出其悟表人
人歎服學者賴之拜祕書少監專刊正事古篇奇字
世所惑者討析申熟必暢本原性簡峭視輩行傲
然罕所推接撰五禮又為太子承乾注班固漢書
上之時人謂顏祕書為班孟堅忠臣帝將有事泰

山詔公卿博士雜定其儀師古奏臣撰定封禪儀注
書在十一年謂為適中多從其說 子揚廷表上師
古所撰匡謬正俗八篇

顏杲卿字昕以文儒世家性剛正莅事明濟安祿山聞其
名表為常山太守 祿山反杲卿及長史袁履謙潛
定策時真卿在平原遣盧逖至常山約起兵斷賊北
道杲卿大喜以為兵犄角可挫賊西鋒玄宗拜杲卿
衛尉卿杲卿兄弟兵大振祿山至陝聞兵興大懼急

攻城杲卿晝夜戰糧矢盡賊脅使降不應至洛陽祿
山怒曰吾擢爾太守何所負而反杲卿瞋目罵曰汝
營州牧羊羯奴耳我世唐臣守忠義恨不斬汝祿山
不勝忿縛之天津橋柱節解以肉噉之詈不絕賊斷
其舌曰復能詈否杲卿含胡而絕 乾元初贈太子
太保謚忠節後又贈司徒 子泉明有孝節喜振人
之急袁履謙及父故將妻子奴隸尚三百餘人轉徙
不自存泉明悉力贍給分多勻薄相扶挾渡河託真

卿隨所歸資送之泉明之殯父與履謙分柩護還長
安履謙妻疑斂具儉狹發視之與杲卿等乃號踊待
泉明如父肅宗拜泉明郾令政化清明誅宿盜人情
翕然成都尹舉其課第一遷彭州司馬家貧居官廉
而孤藐相從百口飢鬻不給無愠歎居母喪哀毀骨
立以行義當世以為難 杲卿兄春卿倜儻美容通
當世務十六舉明經拔萃高第調犀浦主簿嘗送徒
於州亡其籍至廷口記物色凡千人無所差長史陸

象先異之轉蜀尉蘇頲代為長史被譖繫獄為樓閣
賦自託頲遽出之魏徵遠孫瞻罪抵死春卿為請王
真公主得不死時人高其節終偃師丞臨終捉真卿
臂曰爾當大吾族顧我不得見以諸子諉汝後真卿
主其昏嫁

顏真卿字清臣師古五世從孫開元中舉進士又擢制
科遷監察御史使河隴時五原有冤獄久不決天且
旱真卿辨獄而雨郡人呼御史雨復使河東劾奏

朔方令鄭延祚母死不葬三十年有詔終身不齒聞者聳然出為平原太守安祿山逆狀牙孽真卿度必反增陴濬隍祿山反河朔盡陷獨平原城守具備使李平馳奏玄宗聞亂歎曰河北二十四郡無一忠臣邪及平至帝曰朕不識真卿何如人所為乃如此時從兄杲卿為常山太守斬賊將十七郡同日自歸推真卿為盟主兵二十萬加河北招討採訪使清河太守使李粦來乞兵粦曰聞公首奮裾唱大順河朔

恃公為金城真卿為出兵六千賊拒戰敗斬首萬級
肅宗即位靈武真卿數遣使以蠟丸裹書陳事

遷御史大夫方朝廷草昧不暇給而真卿繩治如平
日百官肅然兩京復奏改祝署嗣皇帝帝以為達識

代宗立改尚書右丞帝自陝還真卿請先謁陵廟
而即宮元載以為迂真卿怒曰用捨在公言者何罪
然朝廷事豈堪公再破壞邪時載多引私黨畏羣
臣論奏請事皆先白長官真卿上疏云云時喪亂

後典法湮散真卿雖博識今古屢建議釐正為權臣
沮抑 李希烈反杞建遣真卿往諭之詔可李希烈
遣李元平說之真卿叱曰爾不能致命尚說我耶真
卿立朝正色剛而有禮非公言直道不萌於心天下
不以姓名稱而獨曰魯公 善正草書筆力遒婉世
寶傳之 子顏碩貞元間授顏五品官開成初又以
曾孫引武為叅軍 贊曰嗚呼雖千五百歲其英烈
言言如嚴霜烈日可畏而仰哉

宋朝顏復字長道先師充公四十八世孫也父太初字醇之為魯名儒最後掌南京學嘉祐中訪有道之士京東部使者以復應詔久之擢太常博士孔崇翰乞尊奉孔子祠復因上五議朝廷多從之元祐中為起居郎兼侍講請擇經行之儒補諸縣教官後以天章閣待制充國子祭酒子岐

班 三百十一

牟姓楚若教孫令尹子文為虎所乳謂虎有班文因

氏焉

後漢班彪字叔皮才高而好述作專心史籍辟為司徒掾通儒上才行不踰方言不失正仕不急進貞不遠人敷文華以緯國典 子固

班固字孟堅九流百家之言無不窮究除為郎典校秘書 二班懷文裁成帝墳比良遷董兼麗卿雲 固自以二世才術位不過郎作賓戲以自適 弟超

班超字仲升有大志不脩細節傭書養母投筆歎曰大

丈夫無他志畧猶當立功異域以取封侯安能久事
筆硯間乎左右笑之超曰小子安知壯士之志哉相
者指曰生燕頤虎頭飛而食肉萬里侯相也其後出
征安集西域五十餘國悉皆納質內屬不入虎穴不
得虎子封定遠侯任尚與超交代請誨超告以總大綱
而已尚曰我以班君當有奇策今所言平平耳後尚
失羌人之和果如超言 子勇字宜僚少有父風為
西域長史

曹世叔妻班氏彪之女名昭字惠博學高才 踵成漢

書表志號曰大家 作女誡七章

唐班宏衛人也擢進士第為刑部侍郎貞元初為戶部
侍郎竇參當國德宗以宏熟天下計故進宏尚書副
參參曰閱歲當歸使於公 清潔勤力晨入官署夕
而出吏不堪其勞而已益恭

班景倩入為大理少卿過大梁刺史倪若水餞之行立
望其行塵久之乃返謂官屬曰班生此行何異登仙

關 三百十二

風俗通關令尹喜之後一云夏大夫關龍逢之後

蜀志關侯字雲長斬顏良降于禁威震華夏拜為前將軍假節鉞稱萬人之敵為世虎臣報效曹公有國士之風 子興字安國少有令聞弱冠為侍中中監軍南史隱逸關康之字伯愉獨處一室不通賓客弟子以業傳授尤善左氏春秋徵辟一無所就

唐關播字務元衛州人及進士第楊綰常袞皆善播引

為都官員外郎德宗初對殿中帝問政治之要播曰
為政之本要得有道賢人乃治帝曰朕比下詔求賢
才又遣使黜陟搜逮所遺播曰陛下雖求賢又使舉
薦然止得求名文詞士焉有有道賢人肯奉牒丐舉
選邪帝曰善再遷給事中故事諸司甲庫以令史直
曹利脫為姦播悉易以士人時躉其法薦李元平知
汝州為李希烈縛去播聞訖曰元平事濟矣左右笑
之

山 三百十三

周山師之官掌山林以官為氏風俗通烈山氏之後
晉山濤字巨源少有器量介然不羣為竹林之遊年四
十始為郡主簿功曹累遷吏部尚書再居選職十有
餘年所奏甄拔人物各為題目時稱山公啓事 論
用兵之本閭合孫吳遷右僕射加光祿大夫以老疾
辭詔曰君以道德為世模表吾將倚君以穆風俗何
乃欲獨高其志耶 王戎目濤如璞玉渾金人皆欽

其寶莫知名其器 子簡

山簡字季倫出為征南將軍都督荆湘交廣四州諸軍
事假節鎮襄陽每出嬉遊多之習氏池上置酒輒醉
名曰高陽池童兒歌之有日夕倒載歸倒著白接羅
之句 子遐字彥林為餘姚令時豪族多挾藏戶口
遐繩以峻法到縣八旬出口萬餘 為東陽太守為
政嚴猛郡境肅然

北史山偉字仲才父幼之位金明太守 偉涉獵文史

嘗路逢一尼望之歎曰君方近天子當作好官孝

靜初除中書令

蠻 三百十四

竿姓荆蠻之後因氏焉

管 三百十五

魯大夫食采於管因氏焉 趙郡李氏譜云李叡娶晉

郎中令同郡管襲女 唐乾元河東節度管崇嗣

間 三百十六

史記濟南閻氏豪族

間 三百十七

見姓苑

環 三百十八

楚有環列之尹子孫氏焉楚有環泉漢有河東太守環
饒晉有環濟撰要畧

馯 丘 奸反 三百十九

漢有馯臂辟吳人治易

名賢氏族言行類稿卷十六

欽定四庫全書

名賢氏族言行類稿卷十七

宋 章定 撰

田 三百二十

姓纂媯姓舜後陳厲公子完字敬仲仕齊或號田氏
至田和晏齊為諸侯九代至王建為秦所滅建弟假
及田儋儋子市儋從弟榮弟橫弟子廣項羽時並裂
地稱王

揚子盜名不如盜貨田仲史鰌不如盜也

田仲齊人處於陵號曰於

陵仲

子

新序公季成謂魏文侯曰田子方雖賢人非有土之君也君與之齊禮設有賢於子方者又何以加之文侯曰子方者仁人也仁人也者國之寶也

說苑子思居於衛緼袍無裏二旬九食田子方聞之使人遺狐白之裘

史記孟嘗君名文姓田氏文之父曰靖郭君田嬰嬰齊

威王少子相齊十一年 孟嘗君招致賓客舍業厚
遇之以故傾天下之士食客數千人

田單齊諸田䟽屬也縱反間用火牛以破燕軍復齊七
十餘城封曰安平君 新序云佛肸置鼎致士大夫
曰與我者受邑不吾與者烹田單曰義窮不受軒冕
之服無義而生不仁而富不如烹將就鼎佛肸脫屣
而生之

田叔趙陘城人也喜劔學黃老術趙王以為郎中切直

廉平王賢之 高祖召見與語漢廷母能出其右者
上說拜為漢中守 後為魯相卒魯以百金祠少子
仁不受曰義不傷先人名

田蚡孝景后同母弟封為武安侯後為丞相入奏事坐
語移日所言皆聽薦人或起家至二千石權移主上
漢儒林傳云蚡為相黜黃老刑名百家之言延譽
儒者以百數

穰苴田完之苗裔景公與語兵事說之以為將軍 將

兵扞燕晉之師尊為大司馬 齊威王論古者司馬
兵法附穰苴於其中因號曰司馬穰苴兵法

漢書田儼狄人故齊王田氏之族從弟榮榮弟橫皆豪
傑宗強能得人

酷吏田廣明字子公鄭人也遷淮陽太守連擒大姦徵
為大鴻臚

田延年字子賓以材畧給事大將軍幕府 出為河東
太守誅鉏豪強姦邪不敢發入為大司農 霍光議

廢昌邑王莫敢發言延年按劔廷叱羣臣即日議決其後坐罪田廣明謂春秋之義以功覆過當廢昌邑王時非田子賓之言大事不成大將軍曰誠然實勇士也當發大議時震動朝廷光因舉手撫心曰使我至今病悸

車千秋本姓田氏上急變訟戾太子寃立拜為大鴻臚數月為丞相封富民侯無他材能術學又無闕閱功勞特以一言寤意旬月取宰相封侯世未嘗有也

初千秋年老上優之朝見得乘小車入宮殿門因號
車丞相

魏志田疇字子泰好讀書善擊劍 曹操署司空戶曹
掾以討虜功封亭侯

田豫字國讓除潁陰朗陵令遷弋陽太守所在有治加
振威將軍領并州刺史外胡聞其威名相率來獻州
界寧肅百姓懷之 賞賜皆散之將士每胡狄私遺
悉簿藏官不入家雖殊類咸高豫節

田弘字廣路少慷慨有謀畧 謁見周文即處以爪牙
之任累功授原岷二州刺史 子仁恭字長貴性寬
仁有局度 德懋少以孝友知名丁父艱廬墓負土
成墳隋文下詔表其閭

田式字顯標仕周位渭南太守政尚嚴猛吏人重足而
立無敢違法遷本部太守親故屏迹請託不行

唐田弘正字安道季安時為兵馬使季安死衆奉以為
帥舉六州版籍請吏于朝憲宗美其誠詔充魏博節

度使且賜今名 王承宗叛詔弘正以全師壓境承
宗懼歸窮於弘正弘正表諸朝遂獻德棣二州 李
師道拒命詔弘正進討師道大將劉悟再遇再北悟
乃反兵斬師道詣弘正降取十二州以獻 以功加
司徒同平章事 來朝上眷勞殊等固請留闕下帝
勞曰魏人樂卿之政四隣畏卿之威為朕長城又安
用辭朱紫滿門榮冠當時 性忠孝好功名起樓聚
書萬餘卷

田布字敦禮弘正子弘正使總親兵 王師誅蔡元十
八戰破凌雲柵下郾城以功授御史中丞蔡平弘正
徙成德以布為河陽節度使父子同日受命天下以
忠義多田氏布所至必省冗將募戰卒寬賦勸穡人
皆安之卒謚曰孝諸子皆有方面以忠義為當世所
高

田游巖京兆人入太白山母及妻皆有方外志與共棲
遲山水間召赴京師高宗幸嵩山親至其門游巖野

服出拜儀止謹撲上曰先生比佳否答曰臣所謂泉
石膏盲煙霞痼疾者帝曰朕得君何異漢獲四皓乎
敕乘傳赴都拜崇文館學士帝營奉天宮游巖宅直
宮左天子自書榜其門曰隱士田游巖宅

田仁會雍州人擢制舉為平州刺史歲旱自暴以祈而
雨大至穀遂登人歌之遷勝州都督境有風賊仁
會發騎捕格夷之城門夜開道無寇迹遷金吾將
軍廷中謫罰日數百京師無貴賤舉憚之

宋朝田重進幽州人也周顯德中應募為卒隸太祖麾下太祖受禪遷御馬軍使累積戰功官至刺史太

宗即位為靜南軍節度使雍熙中領兵從飛狐路破虜衆獲其驍將大鵬翼以功改彰信軍節度使徙鎮成德永興重進朴愿不知書太宗在藩邸愛其忠勇嘗遺以酒炙不受使者曰此晉王所賜也重進曰為我致謝晉王我知有天子爾卒不受太宗嘉之既即位謂其無私交故始終委遇焉

田錫字表聖嘉州洪雅人也舉進士為左拾遺錫鯁正寡言恭敬好禮既得諫官即上疏獻軍國要機者一朝廷大體者四太宗褒其言因賜錢五十萬時宰相令有司受羣臣章疏必先白而後敢進錫上書以為失至公之體為河北轉運徙知相州睦州遂知制誥錫好直言太宗或時不能堪錫從容進曰陛下日往月來養成聖性太宗悅愈重之端拱二年歲旱錫上疏有調變倒置之語為宰相不悅罷知陳州召還至

道中復知制誥上疏言諸州奉河西力役生民重困
出知泰州召對言事錫上御覽三十卷御屏風五卷
詔褒之錫覽天下奏章有言民饑盜起及詔敕不便
悉條奏其事真宗以為得爭臣之體擢右諫議大夫
真宗每見錫容必莊嘗目之曰朕之汲黯也卒贈工
部侍郎

田況字元均其先京兆人也後徙居信都舉進士又舉
賢良方正為右正言修起居注知制誥陝西宣撫副

使除龍直知成德軍徙秦州渭州益州聽斷之明蜀人以比張詠召為中丞除禮侍擢樞密副使以疾除左丞卒謚宣簡

延 三百二十一

姓苑後漢有延岑延篤 河南官氏志可地延氏改為延氏

後漢延篤字叔堅南陽人受左氏傳能著文章有名京師舉孝廉後拜議郎邊作東觀徙京兆尹先是 鳳

為京兆亦有能名郡人語曰前有趙張三王後有邊
延二尹論仁孝二致同源 李文德謂公卿曰延叔
堅有王佐之才奈何屈千里之足乎

錢 三百二十二

姓纂顓頊曾孫陸終生彭祖孫孚周錢府上士因官
為氏焉戰國時有隱士錢丹秦有御史大夫錢產子
孫居下邳

南史錢道戢字子韜少以孝行著聞 累以功都督郢

州刺史

孝義錢延慶父為吳慶恩所殺延慶在都馳還道逢慶恩手刃殺之太守表不加罪許之

唐錢徽字蔚章中進士第遷中書舍人加承旨憲宗獨名徽稱其長者時內積財圖復河湟然禁無名貢獻而致者不甚卻徽懇諫罷之帝密戒後有獻毋入右銀臺門以避學士拜禮部侍郎州有牛田錢百萬刺史以給宴飲贈餉者徽曰此農耕之備命代貧

民租入 任庶子時韓公武以賂公卿遺徽錢二十萬不納或言非當路可無讓徽曰取之在義不在官時稱有公望

宋朝錢俶字文德臨安人也名上字犯宣祖諱上稱俶祖曰鏐因唐末黃巢之亂據有吳越之地昭宗授以杭越節制封彭城王梁唐封為吳越國王諡曰武肅父元瓘諡曰文穆王子佐嗣佐卒以弟侖繼侖為牙校胡進思所廢俶時鎮浙東遂渡江襲位漢授以東

南面兵馬都元帥錫以金印玉冊仍領鎮海鎮東節
度使至周以天下兵馬都元帥處之 宋興改大元
帥自太祖受命俶貢奉有加開寶六年封其妻孫氏
為賢德順穆夫人江南平俶與妻子來朝太祖待以
優禮賜劔履上殿詔書不名又以俶妻為吳越國王
妃宰相言自古異姓諸侯王妻無封妃之制太祖曰
行之在我安問舊典時太祖待俶甚厚自晉王宰相
及中外臣僚上書請留俶不遣太祖曰錢俶在吳越

歲脩職貢今又委質來朝若利其土宇而留之殆非
人主之用心何以示信於天下也及倣歸國太祖以
黃絹封文字一複付倣曰侯到國即開之仍諭倣曰
朕知公忠若朕常在公則常有東南他人未可知也
倣感泣拜謝至國啟封皆晉王宰相以下請留倣章
也倣上表謝太平興國三年復來朝遂以國歸有司
焉太宗改封倣淮海國王以禮賢宅賜之錢氏傳五
主共八十四年倣以天下既平求去元帥之稱從之

改漢南國王雍熙四年出為武勝軍節度使徙國南陽既入辭國號改封許王端拱元年徙封鄧王俶以天成四年八月二十四日生至是年八月二十四日薨年六十薨之日又與父元瓘同人皆異之冊封秦國王謚曰忠懿俶崇信釋教性謙謹未嘗忤物為太師中書令者四十年任元帥者三十年富貴之盛無與為比七子惟濬惟治惟渲惟灝惟潛惟演惟齊惟治官至左驍衛上將軍 惟渲惟灝俱至團練

使 惟潛左龍武將軍 惟濟保靜軍留後謚曰宣

惠

惟潛字巨川太祖即位以為建武軍節度使改鎮海鎮
東二鎮王師往江南惟潛從其父俶下常州以功加
同平章事太宗即位加侍中俶封淮海國王惟潛徙
鎮淮南改鎮山南東道又鎮安州封蕭國公俶薨有
詔起復加中書令卒追封汾王謚曰安僖

惟演字希聖幼有俊才俶嘗使賦遠山詩有高為天一

柱秀作海三峯之句倣深器之初補職牙門累遷左
神武將軍咸平中獻其所為文章拜太僕少卿擢知
制誥翰林學士坐為人於開封府請求奪職久之復
為學士累遷至刑部侍郎天禧末丁謂為參知政事
惟演見謂寵盛附之與講嫺好而惟演女弟適后戚
劉美相與共排寇準惟演尋拜樞密副使加尚書右
丞轉工部尚書至真宗崩仁宗即位進兵部尚書為
樞密使時莊獻明肅皇后稱制宰相馮拯以惟演太

后姍家也請出之除保大軍節度使知河陽請覲加
同平章事判許州改鎮武勝又徙泰寧惟演意在進用
嘗謂人以不得於黃紙後署名為恨及屢徙鎮鬱鬱
不得志仁宗耕藉田求入使祠留為景靈宮使莊獻
崩還判河南請以莊獻莊懿二后同配食真宗廟室
御史劾奏惟演擅議宗廟落平章事改鎮崇信卒
惟演少富貴能志於學有文章與楊億劉筠齊名嘗
曰學士備顧問不可不該博故其家聚書侔於祕府

初謚曰文墨改謚曰思又改曰文僖凡三易名云
有子暄為寶文閣待制暄子景臻尚仁宗女許國大
長公主拜左領軍衛大將軍駙馬都尉官至少師安
武軍節度使封康國公生子悅亦至少師悅子端禮
隆興初為參政

錢昆字裕之吳越國王侔之子也隨俶歸朝諸從子皆
授官獨昆與其弟易願從科舉遂登進士第知廬濠
泉亳州壽許七州為治尚寬簡官至右諫議大夫以

秘書監致仕卒昆善為詩賦又喜草隸有文集十卷
弟易

錢易字希白年十七舉進士御試三題日中就言者
以其輕俊而黜之太宗與蘇易簡曰朕恨不與李
白同時易簡曰有錢易者李白才也太宗喜曰若然
當用唐故事召至禁林會盜起劔南不果用復舉進
士甲科為光祿寺丞通判蘄州又舉賢良方正策入
等除秘書丞通判信州後真宗封泰山獻殊祥錄遷

太常博士直集賢院又真宗祀汾陰易脩車駕所過
圖經轉祠部員外郎坐事監潁州商稅歲中知開封
縣又真宗幸亳州復脩所過圖經遂擢知制誥遷翰
林學士卒 易俊逸過人為文數千百言頃刻而就
又善行草書子彥遠明逸

彥遠字子高以父任為太廟齋郎大理寺丞復舉進士
又舉賢良方正策入等由太常博士授祠部員外郎
彥遠因災異上疏遷起居舍人直集賢院卒子勰

明逸字子飛亦舉賢良方正父子三人皆中制科世以
為盛由殿中丞除太常博士通判亳州名為右正言
直集賢院明逸言事希陳執中章德象之意以排杜
衍范仲淹富弼由是三人者俱罷政事進右司諫同
修起居注遷知制誥翰林學士知開封府知蔡州歷
揚清鄭曹四州召還經筵為翰林學士知永興軍代
還卒

勰字穆父以從父明逸任試將作監主簿稍遷國子博

士舉賢良方正科召試祕閣不中除知尉氏縣元豐
中為左司郎中遷中書舍人元祐初知開封府遷給
事中八年以龍圖閣直學士知開封府治京師有名
拜翰林學士兼侍讀罷知池州卒 後入元祐籍云
錢藻字醇老吳越王鏐五世孫也舉進士又中制科為
人清謹寡過居守繩墨為治簡靜立朝無矯亢之節
亦不為雷同處勢利淡如也人稱其長者 英宗時
為祕書校理上書請太后還政通判秀州 神宗時

稍遷直舍人院同修起居注擢知制誥直學士院除樞密直學士知開封府遷翰林侍讀學士卒

錢若水字淡成河南人也十歲能屬文入華山陳搏一見以為有仙風道骨舉進士為同州推官有富民失女奴其父母訟于州鞠于有司獄吏嘗有貸于富民不獲乃劾富民父子數人共殺女奴棄之水中遂失其尸而誣以罪皆應死若水疑之密使人訪求女奴得之乃引以示女奴之父母皆泣曰是也富民父

子賴以得免郡太守欲薦之若水固辭且曰朝廷以此為若水功當置獄吏者於何地太守歎服太宗聞之遂召用擢祕書丞直史館半歲中超遷知制誥翰林學士至道初拜右諫議大夫同知樞密院事真宗即位加戶部侍郎以親年高求解機政乃罷為集賢院學士修太祖實錄初太宗崩有馴犬號呼不食遣送陵所參知政事李至欲若水書其事遺之詩曰白麟朱鴈且勿書勸君書此懲浮俗若水不從至因

若水奏書不列監修官呂端名以為若水掠美若水
援唐故事以為言衆不能折又重修太祖實錄從真
宗幸大名上書曰臣聞用兵以伐謀為上御將以用
法為先比者傅潛為帥擁十萬之衆閉關縱寇坐看
強敵殘虐生民不正典刑曷懲其後楊延朗輩勇於
赴敵奮不顧身授任尚輕見功殊大臣願陛下誅敗
將以徇衆擢有功以勸能使諸將承風各思用命聲
馳塞外威懾窮邊昔劉崇結契丹入寇懦將樊愛能

何徽臨敵不戰周世宗陳宴而戮之因使偏將十數
分擊太原宗不敢支戎亦遁去其後收淮南秦鳳
平關南如席卷之易此用兵伐謀之效也俄知開封
府北人未賓服內出手詔詢若水禦備翦滅之術若
水上言曰臣讀前史論匈奴者多矣若漢婁敬樊噲
季布賈誼晁錯主父偃徐樂王恢韓安國朱買臣董
仲舒之所陳特和親征伐之二議唐李靖魏徵溫彥
博郭正一狄仁傑之所及亦不過戰守之兩端晉桑

維翰不背約之言出於微弱故相趙普請回軍之奏
姑冀息民悉非遠謀臣所不取嚴尤謂自古御戎無
上策臣竊笑之守在四夷制勝以靜非上策而何真
宗善其議謂左右曰若水儒臣中知兵者也拜鄧州
觀察使知并州以疾召還卒謚曰宣靖 若水風流
儒雅有文學善談論事母以孝聞所至有譽望接物
以誠評人貴賤壽夭多驗自知不壽故懇辭勢位賢
士大夫皆宗慕之

錢員外不知何許人白樂天有和其青龍寺上方望舊
山詩云舊峯松雪舊溪雲悵望今朝遙屬君共道使
臣非俗吏南山莫動北山文 容軒隨筆乾道四年
講筵開日上書此章於扇以賜臣邁改使臣為侍臣
云

錢姓出陸終蓋顓頊之苗裔始以世為周官久而以為
姓自三代以來無甚顯者至唐末錢氏多居東南及
鏐乘亂世起餘杭有地十三州號兼吳越而王幾百

年而武進錢氏猶隱德累世不顯豈以力者如彼而以德者如此哉豈其盛衰遲速之理固有不同哉武進之錢自寶七世至君有聞又有賢子不降益彰其勢孰止蓋恃力者雖盛而必衰以德者愈遲而終顯立石劾辭真示彌遠

見歐陽公錢治屯田墓誌

錢之望字表臣毗陵人已丑鄭榜登第慶元間嘗帥五羊以平海寇功除待制同年小錄云孟回中丞之後疑屯田君之族也

燕 三百二十三

姓纂史記召公奭周同姓封燕傳國四十二代至王
喜為秦所滅子孫以國為氏又南燕姑姓國亦為燕
氏漢功臣宜城侯燕倉後漢中郎將燕瑗

北史燕鳳字子章代人少好學博綜經史明習陰陽讖
緯昭成素聞其名以禮致之拜左長史參決國事

道武時歷行臺尚書甚見器重 明元世入講經傳

出議朝政

燕榮字貴公任隋遷青州總管姦盜屏跡

宋朝燕肅字穆之青州人也舉進士通判河南府召為
監察御史遷殿中侍御史為定王府記室參軍擢龍
圖閣待制知審刑院判太常寺建議考正雅樂自肅
始改龍圖閣直學士知潁州徙鄧州以禮部侍郎致
仕卒肅多巧思以創物大智聞天下常造指南車記
里鼓二車及歌器以獻又作蓮花漏世服其精肅所
至刻石以記其法子度官至右諫議大夫

燕達字逢辰開封人也善騎射以材武選隸親衛自內
殿崇班為延州巡檢成懷寧砦羌人以三萬騎薄城
達以所部五百人破之擢鄜延路兵馬都監數率師
深入以撓敵謀凡九戰以功遷秦鳳路副總管郭達
之討交趾也以達為行軍總管師次富良江交趾蠻
人艤鬪船於南岸欲戰不得達默計曰兵法致人而
不致於人吾示之以虛彼必來戰已而果來擊之大
敗遂請降以功遷榮州防禦使進殿前副都指揮使

拜武康軍節度使卒謚毅敏達起行伍喜讀書平時
手不釋卷神宗嘗問達用兵當何先達曰莫如愛神
宗曰愛克厥威可乎達曰威非不用也要以愛為先
神宗稱之

邊 三百二十四

姓纂子姓宋平公子邊之後以王父字為氏

左傳莊公十九年邊伯之宮近于王宮

昭公二十二年宋公使邊卬為大司徒以靖國人

後漢邊韶字孝先以文學知名教授數百人腹便便

五經笥拜太中大夫著作東觀

邊讓字文禮大將軍何進聞其才名召署令史進以禮
見之讓善占射能辭對時賓客滿堂莫不慕其風蔡
邕深敬之以為宜處高任

鳳為京兆尹有能名郡人語曰前有趙張三王後有

邊延二尹

出延
篤傳

五代邊鎬仕南唐初以都虞侯從查文徽克建州凡所

俘獲皆全之人謂之邊佛子及克潭州市不易肆潭人謂之邊菩薩既而為節度使政無綱紀惟日設齋供盛修佛事潭人失望謂之邊和尚

見通鑑

牽

三百二十五

姓苑古冀州武邑有牽氏

魏志牽招字子經為鴈門太守教民戰陣又簡選有才識者詣虜每犯塞勒兵逆擊虜來輒破於是野居晏閒寇賊靜息子嘉次子弘亦猛毅有招風以隴

西太守伐蜀有功為振威護軍

晉書牽秀字成叔博辯有文才弱冠得美名補新安令
嘗扼腕慨歎自謂居司直之任當能激濁揚清

全 三百二十六

姓苑吳郡錢唐後漢丹陽都尉全柔吳桂陽太守生
琮大司馬女為吳主孫亮后

吳志全琮字子瑾錢唐人父柔嘗使齎米數千斛到吳
市易琮皆散用空船而歸柔怒琮曰愚以所市非急

而士大夫有倒懸之患故便賑贍不及啟報柔更
奇之後為將軍假節領九江太守

南史儒林全緩字弘立錢唐人幼受易學得其精微兼
通老莊時人言玄者咸推之

權 三百二十七

姓纂芊姓顓頊之胄封楚楚若敖之孫鬬緡尹權因
氏焉秦滅楚遷大姓於隴西因居天水 又傳云楚
武王克權使鬬緡尹之今南郡當陽縣東南有權城

北史權景宣字暉遠少聰悟有氣俠曉兵權有智畧從
周文拔宏農破沙苑皆先登陷陣轉外兵郎中除
南陽郡守盜賊歛迹人得隸業百姓立碑頌德總
戎薄伐著尅敵之功布政莅人垂稱職之譽豈非有
國之良翰歟

權武字武弄少果勁勇力絕人位大將軍潭州總管

儒林權會字正理少受鄭易妙盡幽微詩書二禮大義該
洽仕齊遷國子博士臨機荅難酬報如響由是為

諸儒所推

唐權萬紀京兆人擢治書侍御史房元齡王珪掌內外
官考萬紀劾其不平帝以為不阿貴近由是獎禮
又言宇文智及賊殺其君其子乃任千牛請斥屏以
懲不軌帝從之

權懷恩萬紀族孫以蔭遷尚乘奉御馭人安畢羅有寵
見帝不恭懷恩適見之退杖四十帝嗟賞曰良吏也
擢萬年令賞罰明見惡輒取時語曰寧飲三斗塵

無逢權懷恩每盛服妻子不敢仰視 更五州刺史
所居威名赫然吏重足立

權臯字士繇泰州人擢進士第安祿山表為幕府臯度祿
山叛欲行慮禍及親逸去祿山反天下聞名爭取以
為屬顏真卿表為行軍司馬召拜起居舍人固辭嘗
曰吾潔身亂世以全吾志欲持是受名耶 韓洄王
定與友善常平臯可為宰輔師保李華亦謂分天下
善惡一人而已子德興

權德輿字載之未冠以文章稱德宗聞其才召為左補闕貞元八年闕東淮南浙西大水德輿建言江淮云云宜擇羣臣明識通方者持節勞徠知制誥進中書舍人知禮部乃上書辭免帝曰非不知卿之勞但擇如卿者未得其人耳知貢舉凡三歲元和初拜尚書同平章事善辯論開陳古今本末以覺悟人主為輔相寬和不為察察名德輿生三歲知變四聲四歲能賦詩積思經術無不貫綜自始學至老

未嘗一日去書嘗著論辨漢所以亡西京以張禹東
京以胡廣其文雅正當時公卿侯王功德卓異者皆
所銘紀雖動止無外飾其風流醞藉自然可慕貞元
元和間為搢紳羽儀云

泉

三百二十八

姓纂本姓全氏全琮之後琮孫暉魏封南陽侯食封
白水遂改為泉氏後魏洛州刺史上洛侯泉企也

北史泉企字思道上洛人世雄商洛曾祖景言歸魏拜

建節將軍 企除雍州刺史豪右無敢犯者纖毫不

擾於人 後兼右僕射志尚廉慎每除一官憂見顏

色 子元禮少有志氣頗閑草隸有士君子之風

為洛州刺史 弟仲遵為梁州刺史有方雅之操歷

官之處皆以清白見稱

唐泉男生字元德高麗蓋蘇文子也九歲以父任為先

人遷中裏小兄猶唐謁者也又為中裏大兄知國政

凡國有辭令皆男生主之後內附高宗授平懷道行

軍大總管 至儀鳳二年詔安撫遼東并置州縣招
流竄平歛賦罷力役民悅其寬卒帝為舉哀詔勒碑
紀功男生純厚有禮奏對敏辨善射藝其初至伏斧
鑕待罪帝宥之世以此稱焉

堅 三百二十九

姓纂潁川後漢有二十八將揚化將軍合肥侯堅鐔
蜀錄有羅江都尉堅峻

後漢堅鐔字子伋潁川人光武拜揚化將軍與士卒共

勞苦每急輒先當矢石封合肥侯

宣 三百三十

姓纂魯大夫叔孫宣伯之後以諡為姓風俗通宋宣公之後後漢有司空宣鄩

後漢宣秉字巨公馮翊人拜御史中丞光武特詔中丞與司隸校尉尚書令會同並專席而坐故京師號曰三獨坐常服布被蔬食瓦器帝見而歎曰楚國二龔不如雲陽宣巨公

先 三百三十一

絳郡今絳州有先氏

左傳先軫晉卿也邑於原又曰原軫 先穀晉大夫是
曰彘季亦曰原穀 先且居晉卿也是為霍伯又曰
蒲城伯 先蔑字士伯晉卿也 漢有先虞

連 三百三十二

左傳齊大夫連稱之後 馮翊白水縣有連氏

莊公八年齊侯使連稱管至父戍葵丘瓜時而往

天

三百三十三

莊子有夭根注云人姓名

顛

三百三十四

左傳晉大夫顛頡

賢

三百三十五

見姓苑

弦

三百三十六

左傳弦子國光州弋陽郡鞞縣東南後為楚所滅子孫

以國為氏

玄 三百三十七

風俗通云玄都古諸侯國也子孫以國為氏焉

蛭 三百三十八

漢書藝文志云有蛭子十三篇楚人也老子弟子

涓 三百三十九

列仙傳涓子齊人

鮮 三百四十

鮮于氏之後蜀李壽司空鮮思明

旃 三百四十一

見姓苑

然 三百四十二

鄭穆公子然之後 然丹字子革仕楚為右尹 蒼梧

姓苑云梧州有然氏

纏 三百四十三

藝文志纏子著書

騫

三百四十四

風俗通仲尼弟子閔子騫之後以王父字為氏 金城
前梁有騫綸西秦有博士騫包晉有平陽太守騫彊
狀云其先避地允吾因家金城

虔

三百四十五

風俗通云黃帝之後

篇

三百四十六

周大夫史篇之後

偏 三百四十七

右偏將軍之後急就章漢有偏呂

綿 三百四十八

晉大夫食采綿上因氏焉晉張万腹心有綿思 河南

官氏志爾綿氏改為綿

便 避偏反 三百四十九

漢有少府便樂成

顓 三百五十

顓臾風姓國伏羲之後或稱顓氏或號臾氏又顓頊支孫亦為顓氏神仙傳有太玄女顓和

專 三百五十一

左傳吳刺客專諸

鱖 三百五十二

專諸亦作鱖也

船 三百五十三

見姓苑

拳

三百五十四

左傳衛大夫拳彌

肩

三百五十五

見姓苑

名賢氏族言行類稿卷十七

欽定四庫全書

名賢氏族言行類稿卷十八

宋 章定 撰

蕭 三百五十六

姓纂宋微子之後支孫封於蕭蕭叔大心子孫有功
因邑命氏焉代居豐沛至不疑為楚春申君客

史記蕭何沛豐人也轉漕關中給食不乏 賜帶劒履
上殿入朝不趨 位為相國功第一 封酈侯食邑

八千戶 漢高帝紀鎮國家撫百姓給餉餽不絕糧道 次律令 太史公曰何秦時為刀筆吏錄錄未有奇節漢興依日月之末光謹守管籥為一代宗臣位冠羣后聲施後世

蕭望之字長倩東海蘭陵人治齊詩射策甲科為郎上疏陳灾異宣帝在民間聞其名曰此東海蕭生耶拜為謁者累遷諫大夫丞相司直歲中三遷 選為平原太守望之雅意在本朝為郡守內不自得上疏徵

入守少府宣帝察其材任宰相欲詳試其政事復以
為左馮翊遷大鴻臚為御史大夫左遷太子太傅
又拜前將軍元帝詔望之傳朕八年道以經書厥
功茂焉賜爵關內侯本以師傅見尊重數宴見言
治亂陳王事有八子至大官者育咸由望之堂
堂折而不撓身為儒宗有輔佐之能近古社稷臣也

贊傳

蕭育字次君以父任為太子庶子後拜司隸校尉守大

鴻臚少與朱博為友長安語曰蕭朱結綬言其相薦達也

南史蕭思話孝懿皇后弟子也外戚令望早見任待歷十二州杖節監督者九焉長子惠開遷御史中丞百寮憚之拜益州刺史嚴用威刑蜀人號曰卧虎後除少府加給事中益不得志曰大丈夫入管喉舌出莅方伯乃復低頭入中邪每謂人曰人生不得行胃懷雖壽百歲猶為夭也次弟惠明亦有時譽為吳

興太守 子眎素梁天監中位丹陽尹丞武帝賜錢
八萬一朝散之親友 榮利不關於中喜怒不形於
色後為諸暨令到縣十餘日挂衣冠於縣門而去諡
曰真文先生 惠明弟惠基善隸書及奕碁累遷太
常加給事中立身退素朝廷稱為善士 子洽字宏
稱累遷臨海太守為政清平不尚威猛人俗便之
惠基弟惠休仕齊為廣州刺史 子介字茂鏡齊武
帝曰蕭介甚貧可處以一郡復曰始興郡頗無良守

可以介為之及至甚著威德會侍中闕帝曰我門中
久無此職宜用蕭介為之應對左右多所匡正遷都
官尚書每軍國大事必先訪介帝謂朱异曰端右材
也 子允字叔佐晉安王鎮湘州以為長史蔡徵曰
公年德並高國之元老從容坐鎮旦夕自為列曹何
為辛苦藩外 後拜光祿大夫 允弟引字叔休善
書為當時所重陳宣帝嘗披奏事指引署名曰此字
筆趣翩翩似鳥之欲飛引謝曰此乃陛下假其毛羽

耳性抗直不事權貴為庫部侍郎在職一年而器械充足宦者李善度蔡脫兒等多所請屬引皆不許族子密諫之引曰吾之立身自有本末亦安能為李蔡致屈

蕭琛字彥瑜惠開從子仕梁歷左戶度支二尚書侍中嘗預御筵醉伏武帝以棗投琛琛取棗擲上正中面曰陛下投臣以赤心臣敢不報以戰栗上每呼為宗老

蕭摩訶字元脩驍勇有名累以功授驃騎大將軍訥於
言恂恂長者至臨戎對寇志氣奮發所向無前子
世廉有父風

蕭濟字孝康預平侯景功封松陽侯

蕭叡明字景濟蘭陵人見孝義傳

北史蕭贊字德文仕魏為都督齊州刺史機辯文義頗
有可觀而輕薄倣儻猶有父風

蕭正表字公儀質貌豐美性理短暗至儀同三司

蕭祇字敬式為揚州刺史于時政寬人慢祇獨泣以嚴
切梁武悅之 子放字希逸居父喪以孝聞廬室前
有二慈烏來集各據一樹為巢時以為至孝之感
蕭退在梁位青州刺史 子慨深沉有體表善草隸書
南士衆稱為長者歷著作佐郎

蕭泰字世怡授蔡州刺史政存簡惠深為吏人所安
子寶字季珍未弱冠名重一時仕隋至吏部侍郎
蕭撫字智遐溫裕有儀表魏使至梁武帝以撫辭令可

觀令兼中書侍郎授幣於賓館仕魏為上州刺史
為政以禮讓為本元日放獄囚歸家三日並依限
而至吏人稱其惠化

蕭圓肅字明恭風度淹雅敏而好學周明帝時拜咸陽
郡守甚有政績改太子少傅作少傅箴太子見而悅
之

蕭大園字仁顯四歲能誦三都賦及孝經論語周文帝
時位儀同三司心安閒放嘗云閭閻有優游之美朝

廷有簪珮之累 北山之北棄絕人間南山之南超
踰世網藉纖草以蔭長松結幽蘭而援芳桂 歌纂
纂唱烏烏可以娛神可以散慮

儒林蕭談篤學詩書春秋禮記並通大義尤精漢書甚
為貴遊所禮拜國子博士

唐蕭詵後梁宣帝曾孫也少貧傭書事母孝煬帝以外
戚擢羅川令

蕭瑀字時文梁明帝子愛經術善屬文嘗以劉孝標辯

命論詭悖不經乃著論非之瑀每上便宜上詔曰得
公言社稷所賴朕既寶之故賜黃金一函上言便
宜建封建又上嘗謂瑀不可以利怵死懼社稷臣也
賜詩曰疾風知勁草板蕩識誠臣又曰公守道耿介
古無以過

蕭鈞有才譽為諫議大夫盧文操盜庫財高宗以自盜
罪死鈞曰若是則天下謂陛下重貨輕法帝曰真諫
議也詔原死

蕭嵩姚崇稱其遠到 會吐蕃陷瓜州回紇殺涼州守
帝徙河西節度使懷保邊人諸部威懾十七年兼中
書令在公謹密人莫見其際

蕭復字履初為學自力非名士風儒不與游以清操顯
為同州刺史歲歉州有京畿觀察使儲粟復輒發以
貸人有司劾治刺史弔之復曰苟利於人胡責之辭
上言宦者監軍權望太重是曹止可委宮掖事

蕭俛字思謙及進士第又以賢良方正對策異等元和

中皇甫鏞薦為御史中丞 王播賂權幸求宰相俛
劾播纖佞不可污台宰

蕭倣字思道擢進士第累遷給事中 上以李璣為嶺

南節度使已賜節倣封還詔書上以法當罰孔溫裕
曰給事中駁奏為朝廷論得失與有司論奏不類不
應罰 懿宗喜佛道倣諫以為天竺法非帝王之所
尚

蕭邁字得聖擢進士第氣孤峻慕李德裕為人 邁負

大節以王佐自任既當國風采峭整天子器之自瑀
逮遘凡八葉宰相

蕭至忠沂州人遷監察御史劾奏蘇味道賊貪至忠長
擊斷譽聞當時至忠謂御史曰故事臺無長官御
史天子耳目也其所請當專授平章事陳時政出
為晉州刺史治有名

蕭昕字中明中博學宏辭科請建崇太學以樹教本持
節弔回紇薦張鎬來瑱等相繼並為名將相

蕭德言字文行明左氏春秋太宗欲知前世得失詔德言等哀次經史百世帝王所以興衰者上之帝愛其書博而要曰使我稽古臨事不惑者公等力也晚節苦學妻子諫曰老人何終日自苦答曰對先聖之言何復憚勞

蕭穎士字茂挺四歲屬文十歲補太學生觀書一覽即誦通百家譜系書檔學舉進士對策第一補祕書正字名播天下盧異等皆執弟子禮號蕭夫子 謂司

馬遷作本紀等失褒貶不足以訓乃依春秋為傳百篇倭國入朝自陳國人願得蕭夫子為師者後客死汝南逆旅門人共諡曰文元先生樂聞人善以推引後進為己任李華與穎士齊名世號蕭李有奴事之十年答楚嚴慘或勸其去答曰非不能愛其才耳

五代蕭希甫宋州人也少舉進士為梁開封尹表象先掌書記象先為青州節度使以希甫為判官希甫不

樂乃棄其母妻變姓名亡之鎮州自稱青州掌書記
謁王鎔鎔以希甫為參軍尤不樂居歲餘又亡之易
州削髮為僧居百丈山莊宗將建國于魏置百官求
天下隱逸之士幽州李紹宏薦希甫為魏州推官莊
宗滅梁遣希甫宣慰青齊希甫始知其母已死而妻
表氏亦改嫁矣希甫乃發衣服喪居於魏州人有引
漢李陵書以譏之曰老母終堂生妻去室時傳以為
笑明宗即位召為諫議大夫是時復置匭函以希甫

為使希甫建言自兵亂相乘王綱大壞侵欺凌奪有
力者勝凡掠人之妻女占人之田宅姦賊之吏刑獄
之寃者何可勝紀而匭函一出投訴必多至於功臣
貴戚有不得繩之以法者乃自天成元年四月二十
八日昧爽以前大辟已上皆赦除之然後出匭函以
示衆

刁 三百五十七

姓纂風俗通齊大夫豎刁之後 戰國時刁勃漢刁

間齊人以富聞子孫居渤海

前漢貨殖刁間齊俗賤奴虜間獨愛貴之桀黠奴人之
所患惟刁間收取使之逐魚鹽商賈之利起數千萬
後漢刁韞字子榮彭城人遷尚書在朝有鯁直臣節出
為魯東海二郡相性抗厲有明略在所稱職常以法
度自整家人莫見墮容

晉刁協字玄亮父攸為御史中丞協少好經籍博聞強
記元帝初拜左僕射久在中朝諳練舊事凡所制度

皆稟於協深為當時所稱許 子彛字大倫歷尚書

吏部郎徐兗二州刺史 彛子達字伯道

北史刁廩字淑和協之曾孫魏明元假為鎮東將軍遷
徐州刺史以西土乏雨表求鑿渠溉公私田又表造
城儲穀詔名為刁公城 後以耆年錫廩几杖劔履
上殿日致珍羞 作行孝論以誠子孫 子遵字奉
國少不拘小節長更修改卒洛州刺史 曾孫沖字
文朗學通諸經陰陽圖緯算數天文莫不關綜四方

受業者歲有數百諡曰安憲先生

刁整字景智少有大度頗涉書史解音律輕財好施交
結名勝 子柔字子溫少好學留心儀禮仕齊遷國
子博士

刁雙字子山少好學兼涉文史位西河太守為政清簡
吏人安悅

宋朝刁約字景純丹徒人舉進士嘉祐中嘗充北使後
為直史館浩然有山林之志乃挂冠而歸一時名流

皆宗仰之作藏春塢為州間勝絕之景日遊其中以
自樂東坡先生有賦藏春塢詩云白首歸來種萬松
倚看千尺舞霜風年拋造物陶甄外春在先生杖履
中楊柳長齊低戶暗櫻桃爛熟滴階紅何時却與徐
元直共訪襄陽龐德公

條 三百五十八

姓纂曹州寃句有條氏條定石趙時條假冉閔時為
司空付秦錄有北都尉條理

左傳定公四年殷民七族條氏帥其宗氏輯其分族以
法則周公

堯 三百五十九

姓纂帝堯之後支孫以謚為姓

北史堯暄字辟邪聰敏美容貌為千人軍將太武以其
恭謹擢為中散前後從征及出使皆有克已奉公之
稱 孫雄

堯雄字休武輕財重氣為瀛州刺史接下以恩為吏人

所懷

節義堯君素煬帝時為鷹揚郎將 後領河東通守以
拒義師朝廷賜金券待以不死君素卒無降心常曰
吾是隋國藩邸舊臣至於大義不得不死

鉞 三百六十

見姓苑 潁川郟縣後漢衛尉安城侯鉞期生丹生
統傳封四代

後漢鉞期字次況潁川人容貌絕異矜嚴有威光武以

為魏郡太守郡界清平郡中服其威信拜衛尉封安城侯重於信義自為將有所降下未嘗擄掠及在朝廷憂國愛主其有不得於心必犯顏諫諍

姚

三百六十一

姓纂虞舜生於姚墟子孫以姚為氏焉左傳鄭大夫姚句耳漢有諫議大夫姚平舜後胡公封陳至敬仲仕齊又為田氏至田豐王莽封為代睦侯奉舜後子恢避莽亂過江居吳郡改媯氏五代孫敷又為姚氏

晉載紀姚弋仲其先有虞氏之苗裔石季龍召之遷冠軍大將軍清儉鯁直屢獻讜言無所迴避朝之大議靡不參決公卿亦憚而推下之後請降於晉封高陵郡公

姚襄字景國弋仲第五子少有高名雄武冠世英濟之稱著于南夏自稱大將軍

南史姚察字伯審吳太常卿信之九世孫幼有至性六歲誦書萬餘言十二能屬文入隋授秘書丞學行

無比

北史外戚姚黃眉魏時尚公主拜駙馬都尉

藝術姚僧垣字法衛仕梁為太醫正後封長壽縣公

唐姚思廉萬年人少受漢書於父察寡嗜慾惟一於學

初察在陳嘗修梁陳二史未就死以屬思廉故思廉

表父遺言有詔聽續煬帝又詔修區寓圖志遷代

王侍讀高祖定京師府僚皆奔忙獨思廉侍王兵升

殿厲聲曰唐公起義兵本安王室若等不宜無禮於

王衆始却布列階下帝義之觀者歎曰仁者之勇謂
此人乎 授秦王府文學王語隋事慨然歎曰姚思
廉蒙數刃以明大節古所難者思廉在洛陽遣使遺
物三百段致書曰景想節義故有是贈 王即位詔
共撰梁陳書推究綜括為二家史以卒父業帝幸九
成宮思廉以為離宮游幸是秦皇漢武事非堯舜禹
湯所為

姚璿字令璋思廉孫力學才辯揆邁舉明經第 永徽

後左右史唯對仗承旨仗下謀議不得聞璿以帝王
謨訓不可闕紀請仗下所言軍國政要責宰相自撰
號時政紀以授史官時政有記自璿始遷益州長
史始蜀吏貪暴璿擿發之無所容貸降璽詔慰因謂
左右曰為二千石清其身者易使吏盡清者難唯璿
為兼之

姚班璿弟篤學有立志擢明經歷六州刺史政皆有績
數被褒賜遷太子詹事兼左庶子太子失道班四上

書諫太子不用其言及敗索宮中得班諫書中宗嘉歎

姚崇字元之陝州人少倜儻尚氣節長乃好學下筆成章五遷夏官郎中契丹擾河北兵檄叢進崇奏決如流武后賢之即拜侍郎后嘗語左右往周興來俊臣等數治詔獄朝臣相逮引一切承反朕意其枉自興俊臣等誅遂無反者然則向論死者得無冤耶崇曰今凶豎殲夷臣以一門百口保内外官無復反

者后曰聞公之言乃得朕心聖歷三年進平章事張
易之私請於崇崇不納出為揚州刺史政條簡肅人
為紀德于碑徙同州刺史先天二年玄宗講武新豐
召崇至帝方獵渭濱即召見與俱馳獵緩速如旨帝
歡甚既罷乃咨天下事衮衮不知倦帝曰卿宜遂相
朕崇知帝大度銳於治乃先設事以堅帝意即陽不
謝帝怪之崇因跪奏臣願以十事聞云云帝曰朕能
行之崇乃頓首謝翌日拜兵部尚書同中書門下三

品封梁國公中宗時近戚奏度僧尼崇建言佛不在
外悟之于心行事利益使蒼生安穩是謂佛理帝善
之奏捕蝗帝方躬萬幾唯崇獨佐裁決故得專
任崇病瘕移告凡大政事帝必令源乾曜就咨焉
崇尤長吏道處決無淹思三為宰相常兼兵部故屯
戍斥候士馬儲械無不諳記玄宗初立賓禮大臣故
老遇崇每見便殿必為之興去輒臨軒以送他相莫
如也

姚南仲華州人乾元初擢制科拜義成節度使

五代姚顗字百真京兆長安人也中條山處士司空圖
一見以為奇以其女妻之舉進士事梁為翰林學士
宋朝姚內斌盧龍人也少仕契丹周顯德末世宗北征
我太祖將兵至瓦橋關內斌為關使開門請降世宗
以為汝州刺史國初從平李筠改刺虢州太祖以西
鄙為憂以內斌為慶州刺史我不敢犯塞號內斌為
虎蓋畏其勇也在慶州積十餘年卒

姚兕字武之隴干人也父寶為隴干巡檢戰沒以兕為
右班殿直熙寧中西鄙進築兕為巡檢以功稍遷左
藏庫副使夏人舉國入寇環慶保障皆被圍兕駐荔
原堡間出奇擊之賊不敢當即引而西鬼章陷景立
于踏白城諸兵皆欲以兵直前兕請先破撒宗城用
其言一舉而克遂破踏白諸羌以報景立之後以功
累遷皇城使交趾寇邊以功領雅州刺史瀘南乞弟
叛兕以功領忠州團練使復為環慶路馬步軍副總

管改廊延鬼章就擒遷四方館使改涇源總管移廊
延路卒 弟麟 子雄古

姚麟字君瑞以父寶死事補三班借職稍遷左侍禁王
韶取熙河知麟材可用為熙河管界巡檢復河州為
諸軍先以功遷內殿承制韶大會諸將飲幕下而露
骨山降羌叛報至韶目麟曰破敵者飲此麟欣然盡
卮酒擲甲馳去食未竟斬數百級還報韶大喜舉軍
盡驚知順德軍以節援李憲兵馬為前軍麟度憲不

遠鼓而出戰方酣大軍皆至大破之賊潰走王師問
罪西夏麟與劉昌祚皆為涇源行營總管聽高遵裕
節制而以兵會于靈武賊十萬餘扼我師麟引兵以
出大破之遂以師抵靈武為諸道先會班師麟復以
涇源兵為後軍賊追躡慷慨激勵士衆爭出死力卒
全師而還是役也涇源軍入為前出為殿戰常為最
而麟實將之諸將得罪例降皇城使永興軍鈐轄初
遵裕與昌祚有隙凡軍事輒沮止以故不濟後昌祚

言靈武不克實受制非戰之罪朝廷問麟是非麟曰
首至靈武昌祚之功城不能取皆臣之罪人以此多
之初復蘭州時夏人請蘭會之地麟奏書謂夏人逐
其君王師是征今秉常不廢即為順命可因以息兵
矣獨蘭會不可與願召諸將飭邊備示進討之形以
絕其望朝廷是其議紹聖中帥涇源召拜殿前副都
指揮使武康軍節度使殿前都指揮使卒贈太尉
麟將沉毅多奇策有功不自矜伐持軍紀律明下樂

為之用事兄兕盡禮兄弟並立功聲蓋一時云

晁 三百六十二

姓纂左傳周景王子王子朝之後亦作晁字或云衛大夫史晁之後

史記晁錯潁川人也學申商刑名以學為太常掌故為人峭直刻深太常遣錯受尚書伏生所還上便宜事以書稱說詔為太子舍人門大夫家令號曰知囊文帝奇其材遷為中大夫景帝時為內史言事輒聽寵

幸傾公卿法令多所更定 遷為御史大夫 詔選
賢良對者百餘人惟錯為高第

北史節義晁清

藝術晁宗字子業善天文術數

宋朝晁迥字明遠澶州清豐人也自其父儉始徙家彭
門迥少從學于王禹偁舉進士為大理評事稍遷太
常丞真宗在東宮諭德楊礪稱其學行及即位宰相
呂端李沆又薦之擢右正言直史館召試翰林遷右

司諫擢知制誥雍王元份留守京師除右諫議大夫
為判官遷翰林學士同修國史進承旨時朝廷方修
禮文之事每下詔多出迥手請解禁林以為禮部尚
書以太子少保致仕召燕太清樓仁宗寵遇甚渥其
子宗慤知制誥亦與人以為榮進太子少傅召對延
和殿仁宗問洪範雨暘之應對曰比年災變仍發此
天所以警陛下願陛下修飭王事以當天心庶幾轉
亂而為祥也迥感疾絕人事屏醫藥具冠服而卒諡

文元 迥善吐納養生之術性樂易純固服道甚篤
歷官臨事未嘗挾情害人真宗稱迥為好學長者楊
億嘗謂迥所著作書命無過褒而得代言之體平生
不喜術數之說而術者嘗以三命語之迥曰自然之
分天命也樂天不憂知命也推理安常委命也何必
逆計未然乎 子宗慤

晁宗慤字世良以父任為尚書郎獻所為文章召試舍
人院除校勘累遷祠部員外郎知制誥入翰林為學

士兼龍圖閣學士知開封府康定元年拜右諫議大夫參知政事會朝廷以金飾胡牀及金器賜唃廝囉宗慤言昔仲叔于奚辭邑而請繁纓孔子以為不如多與之邑繁纓諸侯之馬飾聖人以為不可輕與陪臣乘輿之器可賜外臣乎必欲優其禮加賜金帛可也慶曆二年以疾免除資政殿學士給事中未幾而卒謚文莊宗慤性敦厚事父母至孝篤於故舊凡任子恩皆先其族人當制甚愜人望

晁補之字无咎宗慤之曾孫也七歲能屬文王安國一見而奇之蘇軾通判杭州延譽如不及舉進士為澶州司戶參軍召試為秘閣校理通判揚州召還為著作佐郎遷著作郎出知齊州紹聖初責監蘄信二州酒稅復為著作郎遷吏部郎中兼國史院編修官出知河中府最後知泗州卒有鷄肋集七十卷

晁詠之字之道補之從弟也少有異材以蔭入官為揚州司法參軍未就時蘇軾知揚州補之倅州事以詠

詩文獻軾曰有才如此獨不令一識面耶久之詠
之具參軍禮入謁軾下堂挽而上之顧謂坐客曰此
奇才也復舉進士又舉宏詞一時傳誦其文為河中
府教授元符末應詔上書罷官自是詠之蹇於仕矣
久之為京兆府司錄事秩滿除提舉崇福宮卒堂
兄說之字以道東坡嘗以著述科薦之建炎初為徽
猷閣待制奉祠

橋 三百六十三

姓纂黃帝葬橋山子孫守冢因為橋氏

後漢橋玄字公祖梁國人舉孝廉補洛陽左尉梁不疑
為河南尹玄以公事當詣府受封恥為所辱棄官還
鄉里 徵為漢陽太守

喬 三百六十四

見姓苑狀云本喬氏黃帝之後

晉良吏喬智明字元達以德行著稱為隆慮共二縣令
號為神君

譙 三百六十五

姓纂大夫姓曹食采於譙因氏焉漢譙隆為上林令
以忠諫拜侍中

後漢獨行譙玄字君黃巴郡人舉止敦樸遜讓有行
義

蜀志譙周字允南耽古篤學誦讀典籍欣然獨笑以忘
寢食推誠不飾 為太子家令 以儒行見禮時訪
大義輒據經以對三子熙賢同 同亦以忠篤質素

為行舉孝廉除錫令 周詞理淵通為世碩儒嘉其
行止君子有取焉

晉隱逸譙秀字元彥少而靜默不交於世 郡察孝廉
州舉秀才皆不就

譙令憲字景厚青州人熙載之子也登甲辰衛謫乙科
嘗從尉仙遊人甚稱之嘉定間為大卿出知婺州

焦 三百六十六

風俗通姬姓國也按史記周武王封神農之後於焦

後以國為姓左傳曰虞虢焦滑皆姬姓也為晉所滅
有外黃令焦貢

南史焦度字文績少有氣幹氣力弓馬並絕人 宋孝
武召充左右曰此真健人也

唐焦懷肅母病每嘗其唾若味異輒悲號幾絕母終水
漿不入口五日負土成墳廬守日一食杖然後起

苗 三百六十七

姓纂風俗通楚大夫伯棼之後子賁皇奔晉人與之

苗因命氏焉漢有長水校尉苗浦王莽時有苗訢
左傳昭公五年韓起之下趙成祁午張骼苗賁皇皆諸
侯之選也 成公十六年苗賁皇徇軍曰蒐乘補卒
秣馬利兵修陳固列

唐苗晉卿字元輔潞州人世以儒素稱擢進士第知吏
部選人訴索好官厲言倨色紛于前晉卿乃與相對
終日無愠色久之進侍郎充河北採訪使居三年政
化大行寬厚所至以惠化稱魏人為立生祠立石頌

美秉政七年小心謹畏練達事體百官簿最一省無
遺議者比漢胡廣 自為父碑文有鵲巢碑上賊入
上黨而苗氏松檟獨無傷

宋朝苗授字授之上黨人也以父任為三班奉職稍遷
供備庫副使王韶之復鎮洮也授以兵從韶為先鋒
破香子城河州賊退圍香子以迎歸師乃以五百騎
屬授夜馳往力戰數十斬首四千級居數月又破賊
牛精谷遂取珂諾城城之賜號定羌又城香子號寧

居砦始盡得河湟故地賊復圍河州授往救之以功
遷榮州刺史知河州復以功遷引進使為涇源路鈐
轄知鎮戎軍歷秦鳳涇源熙河路總管元祐初拜武
泰軍節度使卒諡莊敏

饒 三百六十八

見姓苑 臨川漢有魯陰太守饒威人漁陽太守饒
斌永安吳志襄安長饒助

雕 三百六十九

漢功臣有臧馬侯雕延年

調 三百七十

周禮調人之後因官為姓

僚 三百七十一

左傳晉陽大夫僚安魯有寺人僚祖

遼 三百七十二

何氏姓苑有遼氏

寮 三百七十三

魏將軍金牛子玄逃於安改為秦氏

聊 三百七十四

風俗通漢侍中聊倉著書號聊子 漢有潁川太守

聊著著萬姓譜子孫因官為氏

鄒 三百七十五

趙大夫食采深澤鄒邑因氏焉

臬 三百七十六

隋煬帝誅楊玄感改姓臬氏

蛸 三百七十七

齊武帝以巴東王子響叛逆改姓蛸氏

椒 三百七十八

左傳楚大夫椒舉之後子鳴

昭 三百七十九

楚辭云昭屈原楚之三族也戰國時楚有昭奚恤上柱

國

招 三百八十

風俗通漢有大鴻臚招猛

超 三百八十一

漢有太僕超喜

庶 三百八十二

秦始皇將軍庶公漢庶宣為太守

朝 三百八十三

左傳蔡大夫朝吳

搖 三百八十四

會稽越王勾踐裔孫東越王搖之後以王父名為民居餘

杭

要 三百八十五

吳人要離之後漢南河令要兢建中朔方大將軍要珍

囂 三百八十六

代本云玄囂之後

嶠 三百八十七

風俗通黃帝孫嶠極之後

名賢氏族言行類稿卷十八